

■ GLOSSA

Miserere!

DA SILVIO CAMENISCH

*Miserere, misero me,
però brindo alla vita!
(Zucchero)*

Miserere, miserabel jau. Legiais vus questa glossa (sin intimaziun da pliras varts, jau na stoss betg dir quantas varts) poss jau, M13, gia esser en il parvis d'urs. En il parvis (meglier tschiel) d'Origen na poss jau betg esser, quel è preparà per megliers, nus stuain spetgar! Jau, M13, na sun betg in meglier, in mender, din mes menders criticher-experts, e sajan sincers: vegni da detschiert, èn tuts experts. Il meglier sch'ins chatscha mai e pitga mai mai mai! cun lattas da saivs e spizzads cun guttas u tge adina. Mo cun paiverspray che dunnas dovran cunter umens na gida schubregià nagut tar mai.

Miserere, miserabel jau. Cunter mai, M13, difficil fin problematic! dastg'ins er vegnir cun sontga gritta, duess jau avoir mustgas da pievels d'avieuls rumantschs d'idioms. Qua è sontga gritta tolerada u tge din Els, signurs inspecturs da chatscha e monsignurs uvestgs d'idioms? Navair, tolerada?, di jau er. Miserabel jau hai disturbà sensibilmain la sontga pasch (da Tavanasa ensivers:



paisch) da quella buna glied, n'èsi nagut auter che giustifitgà ch'ins ma spaventa, schain nus verbrämen?, ma pitga, cun spizzads cun guttas n'han ins betg insatge meglier.

Miserere, miserabel jau. Hajas misericordia da mai pauper putgant, hai jau cuntrari da vus. Nus tunschain il maun, il bell, dain la pasch a dretg e sanester, enavant ed enavos, il maltgiert tagnain nus enavos!, er sch'el sa smatga envant, less dispit esser l'emprim. Ussa, cun mes emettur-receptor enturn culiez sun jau online cun voss smart directur da construcziun, traffic e selvicultura, Supermario, El decida la fin finala ed anala sch'i fa basegn tar mai in culp final, dà giu d'in nunenconuschent (anoravers. Anenvers savain nus tgenin, schain betg!)

Miserere, miserabel jau. Dentant quest mel d'avieuls, da pievels d'avieuls rumantschs d'idioms, quest mel d'avieuls è stà buntad. Poss jau mo recumandar. Jau na cumond a nagin insatge, il cuntrari, voss Supermario, in super tip, recumonda a mai a mai a mai: Va vinavant, char urs, returna en il Trentino u che nus stuain brischar il pail a tai u pir. L'avieula regina dals avieuls, ina Riatsch?, er egal, ussa cun quella giudess jau anc ina giada ed anc ina giada, gist anc ina giada la glina da mel. Miserabel jau, navair, signur uvestg ed umens da la val, tratg jau er. Dentant jau fatsch printgas a la vita.

Miserere, miserabel jau, definitiv, ma tge buntad mel, halleluja!, gist tar quella avieula regina. Mel n'è betg simplamain mel, probabel er betg tar tschellas avieulas reginas da la vallada. I tanscha. Jau vegn taxà d'experts e fissgugent tranter difficil e problematic, tant per la convivenza paschaivla sco plaschaivla, tant sco quant. Jau sun giast malvesi, jau disturb la convivenza na dastg betg quintar cun la buntad da Dieu e dals bunumans. Il mel è da nui, è buntad, di jau vinavant als mes, er en il parvis (tschiel) d'urs.